



QUÆSTIO MEDICA.

*Quodlibetariis disputationibus manè discutienda in Scholis
Medicorum, die Jovis primo Decembris.*

M. NICOLAO RICHARD, Doctore Medico,
Præside.

An Epilepsia venarum jugularium sectio?

I.

CORPORIS universi periodica convulsio, spumosa salivâ sæpiùs ex ore prodeunti maximè conspicua, cum justitio functionum animalium; Epilepsia est. Hujus causa continens, non imperfecta cerebri ventriculorum obstructio ab hærentium iis in ductibus humorum colluvie, quos præ crassitudine suâ repugnat illuc tam citò ferri, tamque celeriter inde disjici, quàm repentina sunt affectus comitalis & insultus & cessatio. Quin & positis cerebri specubus (animalium spirituum penu) secundum majorem capacitatis suæ dimensionem infarctis, motionem potiùs imminutum iri sequeretur; quàm augeri nemo nescit in Epilepsiâ. Sed & apoplexia morbusque facer penes magis & minùs solummodò discreparent, quod & ratione symptomatum, & ratione solutionis utriusque falsissimum; illa novit quidem interdum hypotropiasmos, statas verò periodos nusquam, per se non solvenda, nisi paralyfi succedente; hic paroxysmis distinguitur, quibus finitis compos sui sit ægrotans, viribus aliquantulum fortassis imminutus; apoplexia fortis, solutu *advenat*, levis ægrè superatur, Epilepsia citra remediorum opem definit per se tardiùs aut ocyùs.

II.

CONJUNCTAM affectionis Herculeæ causam melius putaveris, effræniorum spirituum animalium in cerebri generaliter spectati capacitate rarefactionem, quos ut blandi & leni per cerebrum universum impulsione molliter spatiatos, sensus, motus, principumque functionum auctores benè concipis; ita inibi primum actos vehementius, exin ad quasvis partes corporis præter capsulas nervorum impetu majore salientes, persuadeas tibi parentes fore stupendarum crebris cum subsultibus contractionum in musculis: nempe vellicatis quocunque modo cerebri, cerebelli, aut spinalis medullæ involucris, à tumultuariâ spirituum animalium agitatione, mentis impotentia contingit, atque ab uberiori ac præcipite spirituum eorundem ad tendineas carneasve musculorum fibras vibratione, quibus hæ rigidiores protinus evadunt, partium quarumque movendarum rigiditas & tensio confestim inducuntur, incolis cerebri spiritibus, pyrii pulveris instar, momento accensis, conceptamque flammam præpetere motu quasi rapientibus in tendines musculorum, undè repentina simul & terrificata nonnullorum epilepticorum *παροξισμός* concitatio.

III.

QUOD spiritus animales compellit in ejusmodi turbas, fermentum quoddam est, à quo isti velut ignito fomite semel accensi subito exploduntur; non antè nihilominus in furias agendi, quàm antecedente affectus epileptici causâ, quæ in partium corporis aliquâ, interdum & à cerebro dissitissimâ sæpenumero delitescit, primam quasi scintillam ignis postmodum luculentius accendendi furtim excitante, celer hic perturbatusque motus per continuatam vasorum seriem pervenerit ad cerebrum, editurus illic denique perniciosum insultum epileptici fragorem; qui toties hominem percellit, quoties terra quædam è foco scintilla mittetur, hosce spiritus inflammatura; tamdiu concitandos, quamdiu & confestim & tumultuose ciebuntur intra cerebrum, indè ad voluntarii motus organa majore copiâ simul consulaque dispositione prorupturi. Colligas hinc, cur accessiones epilepticæ graviores fuerint aut leviores? Cur frequentius aut rarius adorianantur? Cur morbus comitialis Hippocrati sanabilis habeatur vigesimum quintum ætatis annum nondum pro-

vestis? deinceps autem *ἀνὰ* & ut plurimum. Cur virginibus menstruum fluorem antea non passis curationis spes non præcitur? Aliis habeatur ægritudo desperata. Quanquam è veteri, crebrâ vehementique Epilepsiâ melancholiam aut fatuitatem fieri non minùs frequens, & spiritibus animalibus à pristina *συνείδησι* descendentibus, & immutatis insigniter cerebri poris, quam cautioni succedere cataphoram, quia dissipatis tenuioribus spirituum particulis, crassiores solummodò supersunt.

I V.

PORRO duplex est medicinæ morbo comitali faciendæ tempus, aliud paroxysmi, extrâ paroxysmum aliud: priori quidem indicationi fit satis, tùm ubi spirituum animalium effectorum ferocia comprimitur, ope medicaminum quæ idonea sint illos in ordinem cogere; tùm ubi spiritus iidem procul à cerebro avocati alias in partes compelluntur, consueta illic munia executuri. Posteriolem implemus, & foco affectionis Herculeæ ab impurâ colluvie, quam viscera malè morata subministravêre, per cathartica medicamenta diligenter expurgato; & minutis iniquiori cruore ægrotantibus, à quo prava diathesis spirituum cerebri incolarum; utiliter quidem è superioribus & inferioribus artubus, commodissimè verò è vasis quæ feruntur ad jugulum; undè securitas major insultus epilepticos, si non omnino, saltè utcumque compositum iri; quam ab usu radicis Pæoniæ maris, foliorum rutæ, florum lilii convallium, visci quercini, ungulæ alcis, castorei, scobis humani cranii; corallii, succini; quorum aliquibus vim inesse non inficiamur castigandorum fortè spurcissimorum spirituum, cæteris occludendorum accuratius meatuum cerebri; & indè maximam duxêre semper ad profligandam Epilepsiam specifica commendationem, huic utrique effectui meritò adscribendam.

V.

INFIDA cæterùm medicina si cum apertis jugularibus venis conferatur, quæ ex interni jugularium venarum trunci furculis, quibuscum communicant, sanguinem quasi rapiunt, & quadam continuatione, deoneratis prius cerebri sinubus & vasis, quod in spirituum animalium fervorem allabitur allapsurumque est imminuunt, viâ demum obviâ & perbrevis foras

effluxurum : scilicet per acceptum scalpello vulnus fuso, cruore, alius è vestigio vacuum in locum influxat necesse est ; in hac autem sanguinis elutriatione, & necessario ejusdem è tenuioribus capillaribusque cerebri venulis in grandioremem externarum jugularium truncum confluxu, ipsæ etiam extremæ omnium propagines, ut suæ succurrant penuriæ vecturæque non desint, incitatum ex arteriis cerebri cruorem avidius excipiunt ; his majori parte vacuatis, & insignem tumultuosæ materiei portionem aliò cessisse putandum, & patientiores evasisse ductus cerebri, ampliorem idoneamque legitimæ spirituum animalium impulsioni libertatem indulturos ; atque adeò segniorem fore deinceps eorumdem impetum ad voluntarii motûs organa : quamobrem paroxysmi rariores ingruent ac leviores, fortassis & nulli, maximè si super hoc eodem præsidii genere aliquoties instetur.

Ergo Epilepsie venarum jugularium sectio.

DOMINI DOCTORES DISPUTATURI.

M. Franciscus-Faustus Alliot.

M. Amandus Doué.

M. Claudius Guerin.

M. Joannes-Baptista Dodart.

M. Franciscus Gouel.

M. Paulus Mattor.

M. Philippus Doué.

M. Antonius Varin.

M. Carolus le Long.

Proponēbat Parisiis PHILIPPUS CARON,
Parisiensis, Baccalaureus Medicus. A. R. S. H. 1689.

Apud FRANC. MUGUET, Regis & Facultatis Medicinæ Typographum.